

[68] CHAP. V.

DE LA MISSION DE SAINCTE MARIE AUX ATARON-
CHRONONS.

CETTE maison de sainte Marie ne porte pas seulement la qualité de Residence, mais encore de Mission, comme ayant quatre bourgs dependans du foin & de la culture de ceux qui y font leur demeure. Ces quatre bourgs font sainte Anne, S. Louys, S. Denys, & S. Iean, le nombre des ames peut arriuer à quatorze cens.

Le bourg de sainte Anne fut le premier qui nous donna de l'exercice, ayant esté tout le premier affligé de la maladie. Il pleut à Dieu nous donner cette benediction que pas vn presque n'y mourut finon baptisé, ou instruit fuffifamment pour iouïr de ce bon-heur. Ce ne fut pas sans effuyer beaucoup de disgraces qu'on emporta cét aduantage: car comme les baptesmes n'eurent pas le succez que plusieurs [69] auoient pretendu de rendre la fanté du corps, ils furent bien tost décriez, & le bruit fut incontinent respandu que cette eau sacrée du baptesme estoit mortelle à ceux qui en estoient lauez.

En fuite de cela les cabanes de plusieurs nous furent fermées, on nous regarde comme portans le malheur du pays, on nous menace & on nous dit tout haut que iamais forcier Huron n'auoit esté tué, qui en eust donné plus d'occasion que nous. Nonobstant nous fuiuons nostre pointe, gagnant tousiours quel-